

Veg agh Ashlish ta'n Vea Shoh

Çhyndaays jeh skeeal scruit 'sy Vaarle ec John Pilling

Va mee crowal 'syn aer, jeeaghyn er shenn Vnr Turner cur jeelt er e chabbyl, tra ren my larum persoonagh sthie clingal.

Va'n oie ceaut echey, as eh ny chadley mooie er yn ard strah. Ayns shoh ta traa lhoobey dy haashagh, myr shoh hantee mee marish. Yn dean smoo aym, va shen dy aaniartaghey y credjue echey dy row eh ceau bootsyn va reen noi bulladyn. Agh cho yindyssagh va'n çhymmyltaght crooit 'syn ashlish echey, ren mee ceau yn chooid smoo jeh'n traa blakey er ny rollageyn va meekey ayns gorrym dorraghey speyr ny h-oie. Cho aalin va'n seihll echey, va mee gearree tannaghtyn ayns shen dy bragh. Dy jarroo, va mee gaarlaghey plannyn dy yannoo shen.

Agh hoshiaght v'eh orrym aahickyraghey eh mychione ny bootsyn echey. Yn cheayrt s'jerree haink eh dy ve cochianglt rish caggey gunn, ren eh lhiggey bullad er y chass echey hene choud's v'eh cur eab er tayrn dy tappee. Ny jean beg rieuu jeh ablid dooinney dy yannoo red ennagh bolvaneyagh. Traa foddey v'eh neayr's ren mee shickyr dy row eh credjal dy row dy chooilley olt elley e chirpey reen noi bulladyn. Agh cha ren mee rieuu sheiltyn dy jinnagh eh lhiggey bullad er y chass echey hene.

Ren my larum clingal reesht, y cheayrt shoh smoo feiyragh. As mish beggan currit ass, ren mee osney as hug mee y coarys aahickyraghey aym dy ve seyr-obbragh as ren mee criggall ersooyl veih'n ashlish echey.

'Sy rieughid aympene reesht, ren mee scrutaghey ny ashleyderyn elley. Va cowrey jeh'n doilleeaid ry akin çhelleeragh: soilshey jiarg va meekey erskyn fer jeh ny bwaagyn. Fer kinjagh v'ayn, shirveishagh y reiltys, dooinney olkyssagh as drogh aigney echey va dreamal dy kinjagh mychione spooilley mraane as torçhagh. Yn cheayrt shoh v'eh er hirrey mooadaght erskyn yn ablid echey dy ghurneil. Va ny dreihyn sheiltynit echey er jeet dy ve ro niartal as v'ad er nirree magh noi'n chrooder oc. As ashlishyn jannoo seose yn rieughid ocsyn t'ayndaue, as ec lheid y voadaght er-lheh, v'eh dy jarroo ayns gaue trome jeh screeaghey magh yn ennal s'jerree echey er-coontey ny torçhaghyn ren eshyn croo son sleih elley.

Rish shallid va miolaght aym gyn jannoo veg, agh cha row mee laccal musthaa erbee ec y traa shen. Dy bieuu ren mee cur cooidjagh scenario ayn ve livreit, as hug mee stiagh eh 'syn ashlish echey. Beggan er veggan, haink yn eddin echey dy ve meein reesht choud's v'eh goaill toshiaght er gurneil cooishyn yn ashlish reesht, myr shoh daag mee eh dy ghoostey 'syn agh dooghyssagh.

Cha jeanym rieuu jarrood yn chield cheayrt va sarey currit daue dy voadaghey ashlishyn gollrish shen. She çhellpath aeg va mish, as va mee kiart er ngeddyn magh dy row y schlei shen aym. Va mee smooïnaghtyn dy beagh y startey aym 'syn Ynnyd ny vondeish da'n theay. Shaghey shen, haink mee dy ve my phryssonagh, as vondeish my schlei ec fir yn lught-reill ynrican.

Rish daa vlein, va gennaghtyn dou dy ve liauyr agglagh, va mee gobbraghey ass-lieh deiney jeh'n lheid shoh, jannoo ny stroshey as mooadaghey ny ennaghtyn oc ayns nyn ashlishyn. Va

mee lane skee jeh ny seihllyn va goll er croo oc. Niuriny lane dy phian as dy hreiys, reiltyssyn lane phooaral ocsyn gyn lhietrymys erbee orroo. Cha nee adsyn va surranse: she adsyn va dy kinjagh torçhaghey sleih elley, as v'ad rieu shirrey orrym dy voadaghey angaishyn ny dreihyn oc.

Ga dy row eh orrym cooilleeney ny aggyrtyr oc, cha row ooilley yn tra aym goll er jummal 'syn Ynnyd. Dy jarroo, ren mee gysaghey moarane. Foddey ny smoo na va ny 'Mainshtyryn' aym sheiltyn. Va mee aarlo nish dy aghtey.

Sheiltynys, slane femoil va shen. Fallsoonagh, Frangagh enmyssit René Descartes, dooyrt eshyn keayrt dy row, "Cogito, ergo sum . . . Ta smooinghtyn aym, as er y fa shen, ta mee ayn." Rere resoon, va briwnys jeant dy nee firrinhagh neesht va'n raa cheddin currit bun-ry-skyn, "Ta mee ayn, as er y fa shen ta smooinghtyn aym." V'ad smooinghtyn dy row eh ymmyrçhagh er dy chooilley chor, y corp tannaghtyn ayn, my va smooinghtyn dy ve ayn.

Cha row mish ayns coardail rish shen. C'ed te, dy ve ayn? Reddyn ta shin gennaghtyn, reddyn ta shin sheiltyn, cha nel shen veg agh smooinghtyn hene, myr yiarragh oo. Smooinghtyn, lurg da çheet dy ve ayn, cha nod peiagh erbee tayrn back eh reesht, as myr shoh ta bea veayn ec smooinghtyn ayns rieughid ennagh elley. Abbyr dy vel shen ayns ashlish . . . Dooys v'eh jeeaghyn dy ve baghtal dy row ashlishyn tannaghtyn ayn lurg baase corpoil yn ashleyder, as shen yn oyr va my charrey, shenn Vnr Turner, 'sy chooish.

Cre'n agh oddagh dooiny as lheid yn aigney glen doieagh ehey çheet dy ve ny reilleyder, cha s'aym, er chor erbee. Agh ta fys aym dy ren mee gennaghtyn çhelleeragh dy row cochianglys eddyr mish as yn seihll ashlishagh ehey, as va mee shicky dy row y tra aym ry heet çheusthie jeh.

Ta'n un ashlish rieu ehey. T'eh aeg reesht, dy dooghyssagh - lajer, aghal, bwaagh. Wandreilagh 'syn Americk Heear Veanagh ayns ny 1800yn, t'eh markiagh magh dy livrey y ven treoghe, Annie Baines, as ish ayns gaue jeh ve currit magh ass y ghowaltys beg eck liorish ransheyr olkyssagh. T'eh rieu çheet gy kione 'syn un agh. Ta'n ransheyr currit fo haart, as ta eshyn as Annie graihagh er y cheilley, t'ad çheet cooidjagh dy lhiasaghey y gowaltys as dy hroggal lught-thie. Mish, veigns Annie.

Ren mee plannal dy chooilley red feer chiarailagh. As mish gurneil yn ashlish ehey veih'n tra shoh magh, veagh shenn Vnr Turner ry gheddyn marroo 'sy waag. Ec yn eash echeysyn, cha bee feysht ec peiagh erbee er. As mish goll stiagh 'syn ashlish ehey, yinnins coadey eh rolaue, nagh beagh caa daue brishey stiagh ayn. 'Syn Ynnyd, chammah's corp marroo shenn Vnr Turner, veagh çhellpath ry gheddyn nagh row gobbraghey dy kiart ny sodjey. Cooish chadjin dy liooar ee, yn schlei er ny vooghey er-coontey rour-ennaghtyn. Yinnagh ad geddyn rey rhyrn dy kiune.

* * * *

Ta shin er ve cooidjagh rish kuse dy vleeantyn nish. Ta three paitçhyn aalin ain, as ta'n gowaltys jannoo dy mie. Yn chooid smoo dy 'astyryn beggey, lurg nyn shibber, ta shin soie sheese er y verandah as jeeaghyn er y speyr hear lossey dy gloyroil choud's ta'n ghrian goll dy lhie. Ny keayrtyr ta shin ooilley markiagh magh ry cheilley as ta shin ceau yn oie er yn ard strah.

Yn Ynnyd, cha nee agh drogh ashlish eh ta cheet orrym eisht as nish. Shoh yn rieughid aym, as nee'm coadey eh dy bragh.

Ny keayrtyn ta feysht ry akin ayns eddin Mnr Turner, agh cha nel shen ayn rish foddey.